

曾忠襄公書札

曾忠襄公書札

卷之六目錄

致劉印渠

復李少泉

與郭筠仙

與毛寄雲中丞

復駱制軍

致黃鶴汀

復鮑春霆

與多禮堂

與鮑春霆

復王柱堂

復多禮堂

復沈幼丹

致王柱堂

致黃南坡

復趙玉班

復萬箎軒

與羅旋吉

致吳竹莊

復趙玉班

復趙梅卿

復黃昌岐

致趙玉班

與劉印渠

復李少泉

復江達川

復丁瑞亭

與郭筠仙

復劉韞齋侍郎

自序
與都直夫將軍

與都直夫將軍

與晏彤甫

與楊厚菴

復郭筠仙

與萬錦堂

與惲次山中丞

復唐義渠

稟官中堂

復吳碧珊

復鮑春霆

復鮑春霆

復閩海晴

復趙梅卿

復劉桐階

復鮑春霆

復許次蘇

與穆海航

復許仙屏

與李少泉

復朱芳浦羅旋吉

復李良臣

與黃南坡

稟官中堂

復劉印渠

復李雨蒼

致張凱章

稟官中堂

復朱芳浦

與毛寄雲

與鮑春霆

復吳曉帆

復彭雪琴

復周沐潤

復多禮堂

曾忠襄公書札卷六

致劉印渠中丞

昨奉五月三十日惠牋敬悉大軍進援潯郡人心復安逆鋒頓挫剋期殄賊知公獨操勝算久矣惟軍儲匱乏轉運煩難欲濟艱危深煩區畫此雖到處皆然然粵西瘠壤則尤費我公之籌策耳敝軍自抵金陵七次獲勝城賊援賊經旬未再出犯探聞僞六王宗又約僞湧王帶一萬三千餘人昨日已到傳令尙須會合猛撲一二次如果官軍不能搖撼卽共率其眾仍回蘇州大約迭次受創之後精銳凋喪其氣已索然大沮矣鮑軍攻克甯國收降甚多又令其眾襲取廣德州城皖南所未復者現僅

建平一縣春霆之軍可來合白下之圍到此速則本月遲亦不
過八月初也薊軍聞將抵淞中與季帥分途辦賊淞中添此勁
旅助季公掃蕩當較易耳

復李少泉

頃奉五月二十五日手示過承獎許讀之增慙令弟與昌期軍
門大捷於江常之間擒斬過萬聞之擊節稱快江陰之賊斷難
久踞由是而掃盪蘇常當如洪爐之燎毛髮中興之勳非公其
誰乎壽州於初五日告陷苗燄鴟張臨淮必更喫緊長公檄何
紹彩陸師赴臨而請厚雪兩帥各派舳板四十號速赴淮河以
救義帥之急所祝臨淮官軍能穩守待援以挫凶鋒乃爲至幸

此間軍事如常鮑軍因病疫繁興不能遽進孝陵衛敝部之逼城而營者晝夜用大礮轟擊迭據逃賊供稱城內傷賊不少惜礮力不能打坍城垣聞尊處所辦西瓜大礮頗多卽懇劃撥數尊並乞賞開花大子數百顆附解金陵以便轟擊聚寶門城樓或可就長干橋之便乘其坍塌猛攻進城此意外之癡想不知礮力果能如此神妙否如蒙慨允並求飭中國之善放大礮者一二人帶量天尺同來則更爲感激但不願洋人來耳承飭廣東溫委員附解洋藥洋火各件已於今日到大勝關並以鳴謝

與郭筠仙

十八日肅復一緘計達白覽金眉生兄於今日抵營其見識才

其實超流輩眉生謂棧商浮開之數每年合計至少亦有三十萬金以之作爲淮南新增之課濟江甯剿賊之餉實有裨益敝軍與鮑軍正窮苦萬分之時如蒙大君子設法轉移以拯饑渴則感激無旣矣茲將眉生所開節畧鈔呈卽希卓奪施行無任盼禱眉生又謂何致華把持貪鄙曾爲眾所嫉惡然新舊交替之時不宜遽動聲色俟將弊端澈底清查之後將何致華輕輕撤去改商棧爲官棧另委一二廉能之員主持舉平日何商所定章程但去其太甚者其餘仍照舊辦理庶順而易行旣可顧喬公之體面而以昔日棧商之羨餘充今日江甯之軍餉於公事亦大有裨益弟以言之可採並以奉聞想老兄慮周藻密自

有成竹在胸也

與毛寄雲中丞

初間肅呈一緘計達台覽金陵新到援賊數萬二十一二等日賊出大隊猛撲敝部劉南雲及鮑軍營壘均經擊退二十三夜南雲挑選奮勇又破其新修礮壘一座殲賊數十名竊料該逆必先撲北路各營然後來南路雨花臺尋戰以軍中之兵力而論於穩守原有把握惜鮑軍病者太多難以出大隊卽敝部各營亦病勇不少擬於出月初旬派員赴湘添募數營並另招數營爲各營補換之用庶九月可到金陵於圍剿更有裨益惟餉精支絀萬分此項經費苦於無可設湊前蒙老兄緘允如省局

稍可挹注卽肯代爲設法關注之深至今銘感當需用甚急之時添募經費不得不仰懇大力經營預爲籌備俟敝處派員回湘咨達冰案卽求老兄俯允將所需經費及軍械各件飭局賜發俾得迅速添募剋期東下則感荷萬萬矣苗逆攻陷壽州其凶醜益熾家兄已請厚雪兩帥派水師五營赴援臨淮以應義渠兄之急矣味根一軍早抵湖口家兄擬令與席硯香李申甫二軍由石埭東壩掃盪而下共圍金陵實國荃所昕夕盼禱者第聞彭湖東建之賊尙未肅清恐一時尙難如願耳

復駱制軍

六月二十一日肅呈一緘計達崇覽頃奉前月初二日賜翰其

所以獎勵而期望者拳拳楮墨感愧之私莫可言罄石逆倡亂
十餘年流毒數省今仗師門威福生擒巨憝爲西南去一大患
實足以快人心而伸天討我夫子不世之勳直與山嶽永峙矣
欽企無量金陵之賊於初一日攻下關頭壘自寅卯至戌亥猛
撲不休其西瓜礮之利害猶無可比擬新副營之壘厚丈餘內
磚石而外土塊亦爲轟塌數處幸劉南雲督隊堅守待其撲近
然後用火蛋以燒之洋鎗以擊之水師幫同轟打極爲得力收
拾賊之精銳無數初二日該逆遂不開礮但見於新壘各帶鋤
鍬時出時沒或開挖地道或別有詭謀均未可知已囑南雲與
水師加意嚴防矣昨得上海來信前革洋酋白齊文挈流氓二

百餘人並炸礮五尊投入蘇城賊中給數十萬金爲購外洋鎗礮昨接鎮江馮萃亭軍門來信探稱蘇賊已解洋礮前來金陵賊當窮蹙已極之時復傾橐以求洋匪與我軍一戰殊堪痛憾國荃惟督率各將弁嚴爲戒備靜以待之苗逆自陷壽州後伏而未動唐義渠圍攻懷遠之師屢獲勝仗又得楊彭派去之水師五營當可大挫凶鋒惟蒙城被圍甚急亦有岌岌難支之勢未審近日情形若何耳印渠制府抵燕後軍政吏治煥然改觀我夫子以人事君功在社稷矣

致黃鶴汀

自都門一晤別且二十餘年矣側耳循聲時殷企想大亂以後

萍蹤各靡定所然屈指籌畫之鴻才自南叟以下則共推譽於閣下也前者李少泉中丞往滬欲求一曉暢政務明白時局之君子並宜於中外者相助爲理論者皆亟難其人國荃深知閣下才能肆應而又熟悉滬中人地是以請中丞勸駕家兄亦欲倚重長才碩畫共濟時艱頃奉手教承許命駕東行具見命世之英未嘗忘甘棠舊治之民此吳民之大慶耳昨邸抄知筠叟簡放蘇松糧道德星聚吳亂不足平也鄙人間之其爲歡抃何可言罄敝軍於雨花臺畔安置老營十二三日城賊兩次出犯均經我軍擊退殲賊甚多已分四千人逼入雨花臺東南隅紮營城賊遂不敢窺伺二十三日有賊數千在朱門焚掠地方弟

派馬隊二營馳往抄殺竇斃賊四百有奇並斃賊酋二名昨據探報僞忠王分賊黨大股來援金陵其頭隊已由丹陽經過中隊後隊亦不久可到弟已飭各營整靜堅定憑濠穩擊當不爲所搖耳惟多將軍提全部援秦李希帥亦以防剿皖豫邊隘尙駐六安未能分兵前來此間合圍剿辦尙須另請濟師也

復鮑春霆

奉到惠書欣悉雄師蕩掃順安一帶賊壘稜威卓著欽佩奚如頃又吉語傳來知麾下已克復青陽矣南岸軍事從此有下手之處實大局之幸也賀甚賀甚弟於十八日率十二營進駐巢北十九日出隊放望岡逼城而營城賊畏威思遁經水師與紫

巢南各陸營於二十早寅刻乘機克復巢縣城池賊向含山大
路而竄四更時分我軍分途追殺六十餘里至含山縣而含之
賊見巢逆敗潰相率而遁我軍奮力擊殺於午刻將含山縣克
復又追殺十五里因大雨未便窮追收隊於含山城外紮營俟
天色稍霽卽當進規和州耳敝軍分駐運漕者亦於十八九等
日與水師會合攻克銅城關雍家鎮各要隘日內亦當進圖玉
溪口也知悉奉聞

與多禮堂

十七日肅呈一緘計達台覽承薦家兄處之統領營官國荃皆
已謀面英姿卓犖足徵名下無虛將來訓練新軍必又增一枝

勁旅其拜賜豈有既耶現與家兄籌商以二千人守安慶以四千人守無爲運漕而三河要隘則仍以振字營防守約隨國荃進剿巢含一路去一萬人耳擬於二十四日由水路東下至無爲州運漕再行登岸先攻巢縣惟敝部吉中各營皆係步隊每遇出隊收隊剿賊追賊之時難期迅速是以稟請挑選向日從征能戰之弁百名操習馬隊月初過武昌之時已稟求官中堂賞給鞍馬雖蒙面允而中堂所購之馬一時尙未能到鄂中刻下進兵甚急不得不趕緊操練側聞尊處戰馬較多或請我公飭各營代買數十匹解交敝軍或由國荃委員至尊處請領其價值登時呈繳此舉不知可行否愚昧無知夙蒙雅愛用敢瑣

瀆統希裁度示復是所感禱

與鮑春霆

初十日肅布一緘計達英盼吉語傳來稱雄師於初八日又獲大捷想見旌麾所指逆膽先寒甯郡各城當不難計日克復也昨據投誠賊供甯郡賊糧已罄復由東壩解來米千餘石以作接濟然賊數太眾不能供十日之糧想克復各城卽在崇朝矣又有賊供稱專俟僞侍王率淞中羣賊由徽州邊界竄擾青南一帶以擾貴軍及敝軍之後路此供則未可信也想岳家軍屹如山立防範森嚴前禦城賊後防援賊布置裕如指日大功告竣卽晉爵封慶何如之所有一切軍情尙祈隨時示悉是所感

自是夏之書本卷二
禱此間援賊日添日多但未近壕猛撲大約俟忠逆大股到齊之時乃有幾次猛犯也弟惟督飭各營鎮靜堅忍穩守以待當不至爲所動搖但日祝甯郡卽克早得麾下統得勝之師勦蕩金陵之老巢則天下蒼生盡戴威福於無旣此則弟私心所刻盼禱者耳

復王柱堂

前日詳陳蕪緘計邀威盼頃奉大咨捷報欣悉 日邊之紫誥方來江上之紅旗迭報鯨波旣靜虎穴立平大功告成然後駕五花之虬履八閩之任其顯榮光寵誠大爲吾湘生色也抃慰奚似弟二十六日至六卽橋明日當進駐穀里邨俟妥籌布置

然後至江甯鎮等處江邊一視形勢總之弟率陸師深入重地全恃貴水師爲根本以水面爲糧路與雄師戈船相輔而行聯爲一片則我陸路之立脚亦穩矣伏乞麾下神光四照處處垂顧敝軍士卒共霑餘光感激曷已

復多禮堂

昨奉二十二日所發惠書敬悉前上賀牋已入崇覽狗黨奔北之餘經大軍追斬逾萬所贖祇四五百人實覺爽快之至狗酋若果爲苗逆擒獻勝帥此害一除則豫捻之患亦易紓矣一有確音尙祈飛示爲感國荃因探報丹陽之賊聞我軍在薛鎮殄滅蕪湖東梁山金柱關三處之賊益覺膽寒遂於二十四日自

焚其小河船隻二百餘號及其積糧三千餘石而遁溧水又百姓均求速進兵猶可及時耕種是以於二十五日進紮合樂山二十六日進六郎橋距金陵六十餘里明日當進紮穀里邨因奉來緘知狗害殲除則北岸可以安謐故調守和州之三千五百人明日渡江惟留嘉字營五百人與水師同守鍼魚嘴而已弟調集所部尙不滿萬三千人實屬單薄擬距金陵二十餘里安置老營深溝高壘爲自守之計但求站住一隅能屏蔽一方之百姓可以下耕則亦於民稍有裨益也金陵地方極大自古用武之地欲求合圍掃穴擒渠非四五萬人不可然能總轄四五萬兵勇以制全勝者當今海內惟大將軍之謀勇威德足以

浹洽軍民之望耳家兄前定計請老兄攻九洲由金陵對岸
渡江勦辦洪逆此時狗黨已滅想已備文咨達冰案矣國荃在
此枕戈磨盾以俟大纛之速臨庶幾追隨鞭橙渥聆鈞訓耳無
任翹企之至

復沈幼丹

月來迭寄寸牋計已次第上呈鈞睽頃奉四月十九日手教祇
悉種種伏審威績茂昭信防安謐並議興築鄉堡使民自爲捍
衛從此邊圉當益固矣國荃率十八營逼紮雨花臺近處並調
事恆舍弟之四千人於初九日到江東橋上面紮營日來惟以
挖濠築壘爲事城賊時復出隊窺伺我軍以鎗礮擊之輒復入

城未嘗過舊濠來尋戰也我軍專意穩守即使有賊前後撲犯當不爲所搖動惟合圍勦辦則非待都多大隊到齊之日不能爲功耳

致王柱堂

初三日曾泐一緘計達台覽昨聞雄師攻勦九洲想戈船所至剷除逆壘如掃籜之易易也良用抃賀敝軍親兵馬隊營奉閣督憲賞給馬二百匹已解至和州應在鍼魚嘴渡江伏懇麾下惠派部下舢板將馬賜渡過江以利征勦感佩舟誼曷其有極弟今早率十二營進紫雨花臺近處離城不過三四里現惟深溝高壘以待援賊之至仍依水面爲糧路站穩腳跟不遽言

攻勦也

致奠南坡

前寄一牋計登台覽國荃調事恆舍弟率四千人到此已紫江東橋一路卽令先駐該處各營移紮雨花臺之東南隅十二日入前濠之前修壘城壘共出賊萬餘人盡力來爭鏖戰三時之久斃賊甚多殺賊亦不少第此枝賊洋鎗甚多我軍弁勇亦受傷近百人十三日我軍復嚴陣備禦仍往紮營業已成功分八營穩紮該處矣惟各勇久勞且酷熱蒸灼多生疾病以及開仗受傷須藥調治而無處購辦焦急彌深用特備文飛咨冰案務懇軫念征夫疾厄之苦卽日籌發銀四千兩遴委幹員赴湘潭

探買藥材星飛解赴敝軍以資利濟其銀卽請於貴局應解月
餉項下劃扣清楚是於東局無所損而於敝營勇丁則受益大
矣吾叟妙手慈心定能俯如所請使各營患病勇夫咸沾大德
也

復趙玉班

頃奉四月二十六日手書承代購驢馬五十匹其值甚廉茲藍
都司押解前來已如數領到僅倒二匹而已諸費關垂初感無
既弟處軍情前信已備陳其概昨十六日寅刻城賊援賊合出
四五萬人布滿於雨花臺東南西南一帶山岡來撲我軍前壘
其先鋒悍賊竟撲至副後嘉字吉後長勝義字克字公字敏字

敬字惠字等營壘邊經我軍以鎗礮憑濠穩擊斃賊極多賊之
躲逃於土堆田坑者仍穩立不退相持兩時之久我軍副後及
敏字各營各挑奮勇出前濠猛勦賊始披靡大敗殺斃轟斃之
賊共千餘人受傷者不可勝計查明我軍受傷不滿百人陣亡
不滿十人此次賊未得逞將來忠逆援黨到齊必尚有幾次猛
犯我軍穩守穩擊倍有把握矣十七日訊逃賊供及生擒賊供
僉稱十六之役礮斃僞對王登時殞命外斃一義一安並斃小
頭目數十名畧爲快意惟統帶義字營張聲揚軍門初六日堵
守濠壘被鎗子中傷左足子入湧泉穴竟於十六日上午身故
聲揚身經百戰所向無前自隸敝軍七年可謂忠勇無匹此次

因傷損命殊堪悼惜弟當詳請照提督陣亡例議卹以慰忠魂
並派其內姪參將武交清接帶該營所幸武交清久於行陣儘
堪勝任可以告慰遠廑也弟所定馬隊營鈔呈尊閱外鈔件祈
閱後送交南叟與意叟一閱爲荷藍都司及貴部勇等人須令
其歇息數日乃令其回湘持贖銷差也

復萬簾軒

望日肅復一緘藉抒謝臆計已達左右矣昨接十六日惠書謹
悉種切前據運漕釐局委員易光濟等具稟到營以運鎮鹽利
最盛已於該鎮大渡地方設立官鹽局收取用錢弟因其荒謬
專擅業經嚴批切責飭令停止茲奉明教所論極爲透澈無任

佩服運鎮地小非若大通水陸衝要商賈輻輳萬不可以開設
鹽局且該委員等祇應於本分抽釐事務照章奉行何得復行
設局賣鹽致同壟斷之鄙夫比於竭流而罔利妄干非分物議
滋生其流弊有不可勝數者謹已鈔錄來書並加緘嚴責該委
員等飭其加倍謹慎倘再不知悛改任意妄爲卽請閣下立予
撤委以示懲儆耳

與羅旋吉

前月杪泐寄一緘計達英盼前接鎮江探報僞忠王李壽成因
聞金陵老巢危急自蘇派撥大股逆黨來援從丹陽城外經過
凡歷五六日之久絡繹不絕二十七八日到有數千人三十日

往打石埠橋經李世忠軍門部下之勇以鎗子傷之初一日到一股紮方山土山一帶本日又到一股號稱數萬紮南門城內外一帶據投出賊供稱僞忠王自率中隊後隊亦近旬可到悍黨頗多國荃已諄飭此間各營整靜以待如來撲犯我軍憑濠牆以穩擊之暫不輕出浪戰賊勢雖重亦無如我何也金柱關濱江要地且係我軍後路貴營扼守嚴密原可放心惟弁勇僅止千人兵力尙單如援賊有聲東擊西之謠務望賢友督率哨勇穩坐壘內一味以鎗子中傷賊之精銳而賊自不敢犯矣如援賊不來窺伺亦求切勿稍涉大意總祈嚴加守禦無一處一時之疏懈則金柱關要隘穩如磐石矣

致吳竹莊

別後正切馳企得手翰並新詩四首俛仰今昔感慨係之當卽
送事恆舍弟一閱庶不負見示之盛心耳大旆卽日赴皖西梁
防軍得令弟長才料理知此關之足恃矣敝軍每日惟以濬濠
修壘爲事城賊匿伏不出自是專待援賊之來弟穩慎圖之當
不爲所搖動惟聞禮帥以全部援秦則此間圍城之舉有非徒
敝軍二萬人之所能任耳他日金陵克復所囑隨園陶谷諸名
勝自當謹守護持且以飛騎奉迓同作十日之飲以盡豪興何
如忍默恕退四字塗就奉上謹識數行未能仰繪豪傑胸襟下
筆之餘徒自羞澀而已

復趙玉班

日來迭寄寸牋計已次第馳登台照昨接初七初九兩日惠書
聆悉縷縷寶郡土匪叢謀滋事幸而破案然其夥黨蔓及於湘
甯諸邑非得麾下密往掩捕嚴保甲練鄉兵稽察守禦恐不足
以善其後而吾邑積匪劉太益等已先賴大力設計誘擒卽此
益見方畧之裕保障之宏宜乎湘中台座之維繫綦殷而不欲
大旆之東指耳敝軍十六日大捷之後防禦益嚴賊亦未再來
尋戰惟兩日傾盆大雨煩熱亦藉以快滌而各營濠牆七八傾
圯築之登登又須旬日工夫始能葢事雨後泥濘異常各勇作
苦於烈日之中下濕上蒸多生疾病殊可念也如何如何昨得

春霆軍門來緘甯國於十五日克復殺賊萬餘僞輔王楊逆率其敗殘逃竄而東甯城尙截留餘匪萬數千人另候發落竄賊則以三營躡之間將至東壩一帶勦辦不知果成行否耶 廷諭鮑軍恢復甯國之後率其大隊會勦金陵多公定赴秦中秦警旣息不知亦可回旆東來共圖掃蕩否若上意本以金陵爲急而咸陽重地不得不暫資多公以戡定之耳少荃中丞昨有牘至華爾願率其眾以助白下之攻稱其火器更有必克之道弟誠未敢應命蓋地利旣匪所宜而流弊猶難殫述損威示弱又其大焉者也薊兄已得巨餉則入浙必速浙疆糜爛已久左帥以一軍跳盪其間得薊軍左提右挈庶幾收拾之較易耳湖

南大水云是出蛟不知田禾曾被損傷否米價騰踊不知近復何如殊縈鄙系

復趙梅卿

昨展雲牋聆悉縷縷惟抽收釐捐原以濟餉若設卡太多必致商民俱病裹足不前來書所論數事俱極允當仁術仁心殊堪佩誦黃雒河東關兩卡相距太近卽至巢縣亦不甚遠重征疊權其何以堪來示欲令下水商船在巢局完釐一次者必到運漕方令再完玉溪應照票免抽若往無爲州一路必到新河口方可再完其上水商船在玉溪口完釐一次者運漕應照票免抽如至新河口或至巢縣方令再完斟酌可謂盡美卽弟從前

指示各局員亦係如此辦法今東關黃雒河中途攔抽不徒照票而且抽釐尊處想必確有所見所聞弟不知係何局何員在彼抽收自應緘致牙釐總局萬公亟將東關黃雒河兩卡停撤耳米糧奉文免稅耕牛向不抽釐而拓皋各卡係多部所設乃竟任意抽取查閱寄來釐票誠可憤歎至巢廬交界之處土匪甚多吉左營可以久駐巢城藉資彈壓然欲札飭赴鄉查拏游勇則恐其派人難期盡妥轉滋擾累鄉里之弊現在該營守城無事之時似不覺其得力一旦有警則深賴其捍衛矣弟處祇管兵事至於地方之事應由大吏與縣令專辦弟不便侵越耳舳板礮船儘可不必派應撤之卡與應免之釐弟當緘請萬廉

訪行查能否盡行禁止則未可知如黃雒河東關一處則固可力禁止也

復黃昌岐

前復兩緘計可次第馳達雄覽昨奉六月晦日手墨敬悉統率戈船周歷吳淞各河道遂有周莊之捷奪獲船隻鎗礮甚夥聲威益壯聞之喜躍刻下貴部各戰船計已修好所調四營何時可到病勇已否調治就痊企念無似此間新添偽湧王一股萬三千餘人然半月來未見動作城內每日輒有數十百人逃出發誠僉供忠逆一時尙不能來賊勢之衰亦可想見然我軍不患逆援之麇至惟是餉糈支絀枵腹堪虞而各勇疾病淹纏幾

及十之六七且時有物故者實爲憫灼耳禮帥不能東來當駐河南以便爲秦豫鄂皖四路策應靈軍約八月中可到此其部多收降眾克甯之後又令襲取廣德州城頃聞建平亦經克復皖南全境肅清其來當迅速也倣軍穩守穩擊甚可自固足紓蓋念

致趙玉班

初間排遞一緘計可呈覽昨奉瑤牋聆悉種種寶屬及吾邑土匪先後就獲羣醜當亦知所懼矣乃劉太益子弟徒眾復欲陰肆其毒而薊軍降眾竟至歃血訂盟潛謀煽逆若非麾下誘執而下之獄安知燼餘之火不爲燎原之烈乎設施方畧化險爲

夷吾楚長城爲功孰大佩誦奚似欣慰奚似此間續到僞湧王
一股其眾約萬三千餘人然羣賊跼伏不出者半月矣據探報
稱賊中米糧並不十分充足而切切耳語狀異平時似不免於
恇懼或由前此數戰折傷精銳迭受大創故不敢復來搦戰耶
我軍幸稱穩固獨疾病纏綿物故不勘念之時爲憫灼耳鮑軍
前訂師期八月初可來此會勦進兵須由高瀆溧水諸處率其
銳師乘勢而入當易掃蕩也都將軍奏請禮帥回江皖 旨下
諸大帥籌議長公謂宜於南汝一帶扼紮西控潼關南蔽鄂邊
而中原亦易肅清請由官相禮帥定奪覆奏希帥籌辦苗捻兩
淮已漸就安謐矣薊軍前隊聞已抵浙其降卒之不靖者作何

發落麾下辦理瀋甯諸邑團練保甲此事最足杜奸尙祈將一切情形隨時示悉舍姪驂駒尺角謬博子衿貽書稱賀祇益慚赧耳

與劉印渠

月前肅布各函未審均達台覽否做部劉南雲彭盛南兩軍會同水陸各營於四月二十二夜攻克巢縣遂同鮑軍門收復含山和州之賊亦勢窮乞降一律肅清矣弟因崑山克復少泉中丞函囑做軍出隊雕剿以牽制援蘇之賊是以與各營密商此間老營單薄不宜遠出惟力攻雨花臺石城使城內之賊不敢赴援蘇州江北之賊亦不敢專注揚郡所謂攻其必救二十七

夜敝軍分六路進兵直薄賊壘各弁勇奮不顧身緣梯直上前者傷斃後者復登攻至天明幸將雨花臺石城及南門石壘九座一律克復斃賊數千惟勢險地寬守之不易已調彭盛南一軍回金陵助剿仍令劉南雲率馬步各營與鮑軍門進攻九洲賊壘如能克復則長江盡爲我有矣查雨花臺爲南門咽喉之地賊以全力死守故和張諸帥圍剿數年屢攻未下今幸一舉克之奪十年未破之堅壘扼西南兩面之要隘於金陵軍事大有裨益知關蓋注并以奉聞

復李少泉

二十八日排遞一緘報雨花臺克復之狀計達英覽頃奉前月

二十日手翰敬承壹是崑山之捷俘斬三萬餘人洵軍興罕有之事我公復切囑諸將穩以圖蘇有大威而不涉大意古之名將何以加此國荃惟日夕引跂以聽捷音耳郭松林本能戰之士惟其心術操守尙難深信經我公如此裁成磨厲當能感激修省圖報也李質堂所募太湖水師長公已令其卽赴下游聽候調遣弟調彭盛南六營於初一回金陵振字二營亦明日可到現於雨花臺前面增修礮壘爲步步進逼之計并面囑劉南雲率馬步各營會同鮑軍進攻九洲賊壘屆時厚帥率水師夾擊或可得手似此牽制城逆當不敢赴援蘇郡也頃奉寄諭殷殷以敝軍及安慶爲念仰見皇上睠懷南服體恤入微

真令人感激涕零不知所報也

復江達川

月前肅泐賀箋旋報雨花臺戰狀未審均塵英鑒否初二日連奉惠書以國荃謬膺疆寄獎借逾恆讀之益增慙悚劉牧承閣下體恤洲租一項准作津貼報銷念寒員而仍不礙於公政該牧當如何感激圖報將來第劉牧經做處委赴吉安辦米業已解纜過皖之時必面請訓示補稟一層希卽諭該牧遵辦爲禱做部彭盛南六營及振字兩營均於初二三日馳抵金陵弟已派制備等營紮雨花臺左路爲步步進逼之計劉南雲所帶馬步各營則隨鮑軍進攻九洑洲賊壘前接雪帥來信鮑軍之米

糧缺乏難以速行適江右解濟敝軍一千九百石已儘數借於
鮑軍以濟其急需惟敝部各營亦嗷嗷待哺尙乞閣下卽日撥
還是所盼禱

復丁瑞亭

頃接惠書敬承壹是目下北河水勢尙淺楊軍門旣親督各
營攻九洑洲賊壘俟抵金陵時國荃當親往河干與軍門面商
一切或將九洑洲攻克之後再請貴軍會攻江東橋賊壘屆時
水勢更漲將堤埂挖斷可以直達桂花樹等處於攻勦更有裨
益也副右營放坐船之事承函致楊君費心之至

與郭筠仙

節前肅布各函計次第達覽聞台旆已赴泰州新任以明體達用之才必能力除積弊使國家自然之利滴滴歸公於軍餉大有裨益昨據敝處軍械所委員劉守曾擬陳淮鹽各條似有可採之處抄呈台覽惟聞有何至華者與其管事徐玉塵把持鹽務狡詐異常已發家至數十萬之多亟應嚴爲驅逐想老兄履任必已詳悉該商一切弊端大加整頓矣此間自攻克雨花臺後已添紮八營逼近城根緊扼西南一面迭據探報及逃賊供稱忠酋率大隊回援金陵江浦浦口一帶皆無賊踪并由溧水漂陽等處調賊數千至金陵城內或與敝軍鏖戰弟已嚴密防之矣厚帥與鮑軍門約攻九洑洲僞壘弟令劉南雲一軍隨

同進剿天已晴明計日內可以進兵矣

復劉韞齋侍郎

昨奉三月二十三日手示承賜舍弟墓表捧讀之餘感繼以泣從此光增泉壤而舍弟之名得與大集俱傳何幸如之另諭一節容卽函商竊念我夫子忠忱亮節朝野皆知公論自在人心豈元規塵所能污耶國荃不學無術深恐力小任重無以報

朝廷高厚之恩而有負師門期望之意是以前奉浙撫之命專疏力辭想區區愚忱必蒙 聖主鑒諒也敝軍自攻克雨花臺僞城及聚寶門外各石壘僞忠王李逆卽由九洑洲渡江回援金陵而北岸一律肅清矣惟忠酋黨羽有未渡完者經水師

截於九洑洲之北約三萬餘人彭雪琴楊厚菴兩帥率各營礮船及李鎮朝斌所帶太湖水師猛攻六晝夜將九洑洲及南岸之下關七里洲草鞋夾各偽壘次第攻克殲賊數萬奪大礮牛馬旗幟無數燒賊之礮船糧船民船數百號實足以大寒逆膽然水師亦陣亡營官二員傷亡弁勇共二千餘人可謂惡戰矣查金陵之賊以雨花臺爲西南屏障九洑洲爲水路咽喉故以全力死守屢攻未下今幸仰仗 皇上威福將士用命不出兼旬而克此兩隘不獨水面之接濟可斷而長江數千里一律廓清實於軍事餉事大有裨益現已咨請鮑軍門率大隊過江卽日可進紮孝陵衛一帶與敝軍及水師各營四面圍攻冀幸早

爲得手不知能如願否也

與都直夫將軍

二十四日肅復一函計達台覽此間迭據投誠賊供忠逆初十
啟行赴援蘇州因我軍攻下關中關九洑洲等處甚急遂於十
三日仍折回金陵防守偽輔王楊逆亦帶小隊入城等語敵軍
自攻克小南門外賊壘已添紮數營於印子山左右鮑軍門大
營抵城北幕府山駐紮蕭維則軍門守浦口江浦下關七里洲
各石壘敵處派劉臬司六營駐守二十日洋船仍敢至中關安
泊用小划遞貨入城實違中國禁令已咨請通商大臣與外國
各領事官約法三章如奸商再與勾通濟賊則不能不開礮轟

擊也敝部選鋒營馬隊現需鞍轡應用特委妥員赴揚州仙女廟一帶購辦未審尊處近日到有口馬否如可協濟生馬數十匹爲敝處騎隊之用則感激無量矣

與都直夫將軍

前肅各函計達台覽昨讀 寄諭敬悉福躬因勤勞過甚偶爾違和刻下想已康強逢吉矣念甚頌甚此間新到援賊萬餘聞彭湖東建之賊亦紛紛下竄勢必來援金陵敝部逼城各營已深溝高壘靜慎以待惟士卒冒暑馳驅病者甚眾所祝秋涼時能一律全愈乃爲厚幸江味根軍門與席硯香觀察兩軍已由湖口循南岸而下將來打至東壩共圖金陵庶此間可望合圍

而收效較速耳苗逆於初五攻陷壽州其肆毒將不可遏臨淮一軍早食豆粥日來必更形喫緊家兄咨請厚菴雪琴兩帥各派舳板數十號由瓜洲洪澤湖赴援臨淮厚翁已派記名提督浙江黃巖鎮丁瑞亭統帶水師三營定於二十二日由金陵解纜丁軍門初赴淮河人地生疏經過揚州之時尙望將軍照拂一切是所感禱

與晏彤甫

月前肅寄各函計達白鼈頃接安慶來文知敝軍請保擊退援賊一案已奉 旨俞允所有六品翎頂樊鐸把總吉永元係尊處委解軍火出力之員行知二包祈轉給該員弁祇領爲荷金

陵之賊屢以全力攻我下關頭敵各壘均經劉南雲廉訪擊退
初一日賊用西瓜炸礮猛轟營牆其凶鋒幾不可遏劉南雲率
勇力堵水師亦開礮轟擊收拾賊之精銳無數惟得上海來信
前革之夷酋白齊文率海島流氓二百餘人投入蘇城帶有大
炸礮數尊賊申給數十萬金爲購外洋鎗礮又接馮萃亭軍門
來信蘇賊已運炸礮數尊來金陵防守當軍務正值得手之時
忽有洋匪助賊之事殊堪髮指敝軍惟嚴密防之相機辦理知
關蓋注并以奉聞

與楊厚菴

頃接郭筠翁來函謂秦州鹽務非仗麾下聲威派撥水師一二

營前往彈壓更難下手整頓囑速爲函商等語茲將原信節錄
呈覽想麾下與筠仙素相投洽當渠亟望援手之時想必允代
爲設法鄙意鹽法之壞在私梟悍勇我輩水陸血戰欠餉年餘
尙不能分絲毫之利彼狼子野心擁兵殃民者居然據國家
之大利以飽私橐筠仙以孤立之勢而欲除數年之積習又自
度力有不逮殷殷乞援於麾下其用心亦深可敬矣倘蒙麾下
親至秦州訪視筠老一次就地察看形勢并與筠仙面商一切
則若輩聞風股栗不敢肆行無忌於全局大有裨益在麾下往
返不過耽閣十天可慰舊友瞻望之殷而在筠仙則仰借威名
可以重整鹺政沾光多矣如果辦有成效必能設法以濟貴軍

可謂一舉三善如將來麾下撥一二營水師駐防泰州一帶或外江不敷分布或另添造戰船數十號以資防剿亦是一法管見如是尙希卓奪示復以便復答筠老也寫至此接南雲信稱初六日賊用大西瓜礮攻頭壘每子三十餘觔萬分喫緊之至并以奉聞

復郭筠仙

昨奉六月二十六日手書及詳安慶公牘具見老兄之勵精圖治鉅細不遺其用心亦良苦矣弟於鹽政本屬外行而細繹來書其所論驟難更張之處亦屬至情至理想眉叟抵泰必有與老兄參酌損益之法借用外江水師一層頃已函致厚帥并請

其親赴秦州一行庶可與老兄面商一切苗逆於六月初五日
攻陷壽州後伏而未動厚雪兩帥共派戰船五營已於前月杪
由瓜洲駛入臨淮以應義渠中丞之急家兄因彭湖之賊結筏
擄船有駸駸乎偷渡北岸之勢請雪帥親率戈船至彭湖防堵
日內計已上駛矣金陵之賊於初一日用炸礮轟坍劉南雲所
紮下關頭壘比經擊退初六日復用極大西瓜礮攻下關頭壘
子重三十餘觔危險萬分幸劉南雲與水師極力堵住斃賊無
數其南門一面賊於夜間縋城而下偷築新壘意將安炸礮攻
我前敵各壘初五早弟派振宇營鬼水破之其印子山賊壘三
座自六月以來敝軍晝夜用大礮攻擊屹立不動初六夜派蕭

孚泗等率隊環攻登壘之候純用大刀火蛋殲其守陣之賊無一漏網幸於初七早克其第一堅壘惟靠七甕橋尙有小壘二座死守不動我軍用鎗礮轟擊迄未收隊諒亦不能久持也惟據髮探供稱僞輔王楊逆於近日出城糾合大股先犯金柱關花津等處以擾我後路未審確否弟已飭駐防各營嚴爲戒備矣

與萬錦堂

十四日肅復寸箋計登記室此間軍事如恆弟擬自鑄礮礮爲攻城之用必須珂鄉平日所製磁器之白泥以爲模範融銅之罐刻下需用甚急若由敝處派員採辦則有稽時日茲特排單

飛遞此函務懇閣下卽日派弁飛速至景德鎮代辦白泥二千四百劬以成塊者爲佳卽由尊處委弁請礮船星夜速解金陵以濟要需所有此項泥價及沿途採買解費均請閣下代出弟卽當如數奉趙斷不有負盛意也

與惲次山中丞

十三日排遞一函計達台覽此間自初九大戰之後城賊遂不敢遠出蕭維則軍門帶來七營擬卽日移紮卽子山東路并擬於敝部抽撥數營紮過秣陵關小河庶可據秦淮之上游斷東路之接濟查七襄橋至孝陵衛約七里之遙非添萬餘勁旅不能合圍是以令劉臬司連捷添募四營朱總兵南桂添募三營

所需召募經費及採買之銀共二萬一千兩當營中艱窘無可設法之時不得不仰懇大力維持於東征鹽茶釐金三局通盤籌畫明知南中供億浩繁此次敝軍添募十餘營前後咨懇惠撥之款爲數甚鉅過於竭忠盡歡瑣瑣無厭然當此乘機進取萬不可緩之際不能不煩瀆盡忱以紓眉急頃以敝軍奇窮奏請頒發各項部照交尊處與方伯委員勸捐江浙及各省在湖南貿易之人以濟敝處軍餉茲將片稿咨呈想閣下垂念饑軍眷懷桑梓必允爲登高之呼以止望梅之渴也

復唐義渠

前布賀函想邀鈞察頃奉來示備承藻飾彌增愧汗國荃駐軍

危地師久無功而僞忠王糾集各大股來援金陵於二十日偪近後濠外排列隊伍東自方山西至板橋橫互六七十里號稱六十萬旗幟如林鎗礮如雨城賊亦出大隊相應其先鋒賊數千名周看後濠形勢下午東西兩頭並撲尙是小試其技城賊亦分枝撲湘恆營各路均經擊退是夜賊未收隊二十一日分無數枝分道偪近前猛撲勢更凶悍疾聲喊叫子如雨注自辰至亥未嘗少息經各營憑濠以鎗礮轟擊斃賊甚多二十二三兩日夜撲犯更甚於二十一日現已分一大枝繞至河岸搭造浮橋過河往洲上列隊意圖從中紮壘斷截糧道我軍已增修十數小壘扼路防守運糧之路一意以鎗礮對擊頃據投誠賊

供此次賊中傷已極多並傷賊目數名然我軍防守仍不可弛
惟督率將士晝夜防範嚴密堵剿勉力以支危局靜守以待援
軍但不知何時乃有援兵耳

稟官中堂

竊國莖於十一日肅具蕪緘計可先呈崇鑒此間如常堵剿十
一夜賊之攻撲東路各營者仍前凶悍以洋鎗洋礮開花礮子
偏近濠壘明攻於上暗挖地道於下經我軍靜鎮以待憑濠穩
擊斃賊甚多十二早黎明時西南隅後濠外之賊悉集大隊歸
併東路一帶並厚集稻草及門板等件於東路前後長濠外均
安置暗地道穿越路謀爲全力猛攻之計是日上午賊之大

隊悉埋伏前後左右午後賊遂將隊伍引近東路十餘營及暗地道邊未正時分兩處地道同時轟裂煙燄冲天聲震山谷石塊土塊飛騰十餘丈高兩處各崩塌二十餘丈寬賊乘此煙燄中蜂擁齊進凡攻東路十餘營之數萬賊見此地道一開路路併來萬弩同發凶橫無比其轟裂嘉字營者經武明良朱洪章彭毓橘李祥和等率隊搶住其轟裂吉後營者經蕭開印胡萬清陳萬勝吳光春王可陞等帶隊搶住賊雖冲入倒口內不少然我軍堵殺甚力竟克保全自未正時分起至日晡後賊共猛撲五次國荃先懸重賞以敢死之士搶護外口而以洋鎗大礮排擊火蛋火藥堵住內一層其猛撲副後信字從字長勝義字

堅字營者經劉連捷李臣典何玉貴曾昭禮胡松江武交清羅
兩春等堵住楊心純等均帶隊策應蕭孚泗張光明曾貞幹等
均挑奮勇親督搶護口子共計各路殺斃燒斃之賊及鎗礮傷
斃之賊實數在八千以外是日也蕭開印胡萬清李祥和曾昭
禮陳萬勝等均受傷陳得月陣亡我軍陣亡不過數十人受傷
不過三百餘人從此東路較前定必大鬆勁矣惟攻副後信字
等營者尚有兩暗地道未轟然我軍必能設法堵殺守住定可
無虞此次如天之福仰仗鴻威各營將士同心用命陞字營及
仁勇智勇楚勝等營兵勇策應均極得力保全危局頃刻之間
轉而爲安大挫二十萬梟張之寇稍安孤軍萬眾之心知關鈞

注謹將十二日堵殺獲勝情形肅稟奉聞仰慰慈念

復吳碧珊

頃奉琅函敬聆種切承示下游沿江水師經麾下奉都帥命籌辦一切防守盤查各路奸細從此掃蕩鯨鯢肅清江面全仗大力經營也此間僞忠王率大股援賊於前月十九抵後濠外人多勢悍異於尋常自二十日至月之初二三四等日晝夜猛撲不休並分枝於洲上紮壘意圖梗塞糧路比經派隊迎擊賊即敗遁旋於東路各營濠外開挖明暗地道並多集草木意希填濠冲突經各營派隊於黑夜將賊之明地道毀挖初五早五更時分令守後濠各營一齊出隊將近濠賊壘十二座盡行攻破

自唐書之書本卷六
殺斃焚斃之賊實數在三千以外從此西路賊已鬆勁矣初五
夜五更東路賊之攻副後等營者均蹲伏濠裏經我軍以火藥
火蛋擲下燒斃之賊甚多賊卻退又鎗礮轟斃賊無數現在東
路賊勢稍衰我軍再能支持旬日穩守月餘則賊力蹙計窮方
易勦辦耳刻下我軍防範仍嚴密不懈大局或可穩保無虞知
關蓋念謹以奉聞

復鮑春霆

勇旋奉到二十一日惠函承示收降董容海之後又收降盧榮
忠水師一支佩服無旣惟督院僅代爲籌及二千人之糧食誠
如來函所云未足以廣招徠也以酌量遣畱恩威並用麾下勲

名蓋代威震東南各路之賊莫不望風披靡將來所至之區容易奏績忭頌奚如承示貴營勇丁亦多疾病蓋勞苦征戰之所致也想建醮之後定獲神麻敝軍病者十之七八前設章醮禳禱迨又做古儺禮以賽神似亦畧有效驗今歲疾疫到處皆然來論謂爲刼運將盡亂極必治之象此誠不易之論也大纛八月初旬可以啟行弟比宣示各營凡屬軍民莫不交相慶幸大功告成定在指日欣慰無旣此間城賊援賊已有一月未來尋戰二十三日又添一股人數不滿一萬訊賊供稱係僞燕王陳逆領帶前來乃忠王之部下也探稱侍逆輔逆各黨有聚集深陽四安定埠一帶者容日大軍一至當如疾風之掃落葉矣預

賀預賀

復鮑春霆

昨日勇旋接奉郇雲今日又奉排單遞來初一日賜書欣悉麾下克復甯郡之後收降僞保王童容海六萬餘眾並又襲取廣德州將侍逆部賊斬馘萬餘以所向無敵之威聲用以毒攻毒之妙計古之名將何以加焉弟聞之益深欽佩承示大纛起程之期早則初旬遲亦不過中旬仰見大帥息息相關之雅意此等高誼直薄雲霄公義私情實深兩感尤令人須臾難忘也刻下尊處想已咨呈督院說定師行之期及進兵之路矣不知督院已飭糧臺多濟雄師鉅款得以爰方啟行否念念弟自聞麾

下眷念金陵親來助剿無日不喜溢眉宇現在整修濠壘日益
堅固以待大帥之蒞臨一俟臨近之日弟當遠迎福星重話舊
日歡情也此間日來平穩近據投誠賊供稱偽六王宗意欲再
行猛撲一二次如不能撼動官軍卽仍退回蘇州云云想係探
聞大旆將來是以預思逃遁耶

復閩海晴

接奉琅函知前復一書已邀英盼閣下長才優裕久爲當道所
推稱此次奏調申江定見聲華益懋至閣下賢勞數載暫行乞
假還里料理各處墳塋事屬至情想督院無不見允也此間自
七次獲勝賊勢已衰近雖添僞湧王一股萬餘人亦尙未動據

各投誠賊供稱城中以屢次折損精銳羣賊時時恇懼又糧不甚充足賊有粥食度日者二十三日又添援賊一股旗幟鮮明儀從甚盛人數則不滿一萬耳鮑軍門前有來書云當會勦金陵大約中秋前後可以進兵也

復趙梅卿

接奉郇雲敬聆壹是巢縣私卡經姚李兩君整頓商困想可日甦柘梟設立分卡以資控馭卽用該汛備沈殿元經理於抽釐旣無偷漏之虞於用人猶得因利乘便之法足見細心斟酌柘梟劫案果係李盈昌報復私仇殊爲法所難追敝處自當盡法懲治也來書所云嗣後採辦柴薪不得令往原籍地方以免挾

嫌生事實爲切要之言弟謬領戎旃無時不以擾及良善爲恐特患耳目之所不及勇丁輒敢妄爲分得良友關垂匡所不逮感且不暇其敢相責以自護乎嗣後如有干係敝營之事閣下果確有見聞仍望隨時示知則佩紉無旣矣此間軍事如常營中勇丁尙多疾病大約秋涼後始能漸次痊可也

復劉桐階

接奉來函欣悉權篆襄垣已於初三日蒞任以該邑之凋敝得閣下長才治之定當日有起色所冀寬嚴互用義不妨仁則循吏之風再見於今日矣查該邑被陷已久甫經克復難必其無刁民紛紛控訴從前賊索財物之案以遲報復之志者鄙意以

爲大亂之後宜予以自新之路方可以解散賊志既往之罪概不咎論若自拔歸來之後再犯科條則置之重典懲一戒百於地方斯大有裨益也高明以爲何如敝軍逼壘雨花臺之後土工已竣可以守勦兼施近日蘇常援賊已到五萬餘人聞尙有踵至者於六七月可到現在敝軍已先爲自固之計徐圖制賊之方濠壘高深當不至爲惡風巨浪所撼惟糧餉不甚充裕兵士病者頗多極須甘霖解愠舒暢兵氣藉資休息乃可以禦大敵而無患耳聞上游頻有刼搶之案弟出示嚴拿游勇茲奉上百張煩四路張貼爲荷

復鮑春霆

前排遞一緘奉賀捷喜不知已邀英覽否頃勇旋奉手書敬悉
一切前承郵示之緘至今未到此次麾下攻克甯郡如此之速
殺賊如此之多釋放脅從如此之眾恩威並用使賊眾膽落心
驚咸知 聖天子恩澤浩蕩改轍易途有所歸向者莫麾下此
舉若也欽頌曷已怵舞奚如弟前求麾下緘商督院除畱守甯
郡外麾下親率得勝之師會勦金陵一著實緣見金陵有可乘
之機惟待雄師一到便可如得甯郡之速攻此老巢拔此名城
擒此渠魁則東南大難平於麾下之手矣然後由蘇而及浙直
易如反掌耳大兵將來進取與其與左軍謀掃浙江枝葉之地
不若來金陵先拔本根之毒且弟與麾下氣誼投合事事皆好

商量共辦去年承大軍援應安慶弟至今心切感激此次重來共事一方則彼此之夙願共償豈不美歟所望麾下早爲緘告督院一俟秋氣初涼之時卽率大纛來此恰好與僞忠王大股在金陵相遇可以一戰成功可以擒洪逆之首於帳下則三吳之民不日可以出水火而登衽席非獨弟軍瞻仰之幸也此間雄黃鎮有援賊四萬餘人尙未動作其地距金陵四十里須過兩小河無橋無船亦不便往擊也二十日下午到賊八千餘人據探報係甯境來者今日此間得雨甚大且多濠牆塌者不少弟惟飭各營慎守而已

復許次蘇

奉到還雲猥以前書不訾之語發爲宏議且獎許備至不才何
足以當之然大聲疾呼之論又曷可少耶夫髮逆倡亂十有三
載矣 朝廷之所恃以滅賊者兵至兵不能制賊而徒能擾民
致使吾民旣苦賊擾又苦兵擾是不如無兵之猶愈也將居千
萬人之上而不能俾此千萬人者有殺敵致果之心是直謂之
無將可也 國家出萬不得已之計括民財以贍軍凡源源飛
輓之資皆漉漉脂膏之所出彼乃宴安逸樂以糜之驕侈奢淫
以耗之不肖之徒方且爭趨而效法之不顧百喙之叢集但快
一時之耽樂視殘寇如猛虎而視良懦之民命則又螻蟻之不
如似此爲患又安有窮期耶弟以一介書生罔知軍旅之事旣

受 恩深重何敢違我素心曩者深入重地提一旅之師以搗
逆巢蓋冀爲諸道抽釜底之薪耳乃事與願違莫能脫趙公湖
州之厄僅能弛松江一郡之圍夫聲其西而東不掣者非以賊
之鬪士倚於我哉雖同事有冒進貪功之誚然質諸我心尚無
悔焉當此責無旁貸之時未敢自希成功遑暇評量他人第搔
首茫茫正恐元規塵惡到處拂人庾樓固不徒在江在鄂且早
屬集於吳矣質諸解人其謂然否來諭貴臺額餉月需十五萬
有奇而所恃之三款滬餉三萬不克再益鹽釐贏縮無恒至多
不過二萬江釐則太阿倒授中飽之外繼以乾沒所羨幾何雖
以宏濟艱難如閣下而事當棘手巧炊爲難宜乎忠憤之忱宣

爲讜論也夫自古無窮而不變之時吳中餉源一擾於賊再擾於似兵非兵之兵其害不可謂不亟也然得矢心公忠如閣下者以支危局吾楚郭筠仙黃鶴汀兩公亦將以觀察來蘇相與共挽頽波家兄暨少荃中丞從而主持之彼時極圖釐剔卽如尊論兵與民將與兵水與陸營與臺八者合一之指而措置之則清源節流餉糈未必不可復裕餉旣裕而在內者無侵蝕在外者無虛糜苟得若干釐稅之貲卽冀收若干釐稅之效而無似如弟亦當隨諸帥之後同心矢志共助澄清東南之事要未始不可勾當也裏下河完善之區賊固未一日忘窺伺也幸廟謨嚴切在當事者或不至終以泄泄置之定可無虞飛渡歲

事不可常恃來諭本抉要之言此又付之天意非人事所能謀者閣下澄懷亮節賤兄弟心儀久之昨已將來緘付安慶並達尊悃矣陸子靜謂士君子抱負優裕自然如夏鼎商彝不必盡爲人識要必爲朝廊必不可少之器弟爲閣下誦斯言固知其將大張於吳也盈盈一水景企爲勞書法乃妙絕一時令人歎艷

與穆海航

十二日率復一緘計已達臚前承閣下允在貴治辦米運濟敝軍實深感激刻下敝軍與援賊相持將近彌月營中餉項萬分窘迫卽米糧亦積儲無多急需購辦接濟方足以免饑乏而固

軍心而營中弁勇日夜堵勦尙嫌兵力單薄實不能多派弁分途採辦且現添援兵數千均暫由敝處供給需米尤多應懇閣下會同新河口釐局葛篤生大令代辦乾潔熟米二萬石分作十餘批運解前來弟昨緘請家兄訓示可否家兄業已允緘告尊處辦理準從抵征項下報銷也已另備公牘祈查照施行爲感此間援賊攻東路各營者於十二日未正將地道兩處同時齊轟煙燄冲天石塊土塊騰空數十丈兩處均轟裂二十餘丈路路之賊合力猛撲萬弩齊發凶橫無比幸我軍懸重賞搶住兩口子而各營亦極力堵勦大礮洋鎗火蛋一齊施放共計殺斃燒斃轟斃之賊在七八千以外自未正至初更該逆共猛撲

五次大受懲創而去現在該逆尚有地道數處未蠹已令各營
慎以防之必能極力堵殺搶住以鎗礮火蛋多損賊中精銳然
後乃出濠一戰庶可期掃賊馘耳

復許仙屏

頃奉八月望後二日惠書知前次惠緘由吳城胡蔚之大令處
轉遞至今未到不知蔚之何以未速至安慶轉遞悵望曷已細
繹來書卓識闕論獎勵殷肫慚感交集弟孤軍深入初幸安謐
嗣因疾疫流行士卒因病物故者不少前月十九日僞忠王率
大股援賊麇至二十日逼近後濠橫亙六七十里層疊密布旗
幟如林城賊亦傾巢而應至午刻有先鋒賊數千前來挑戰經

我軍鎗礮擊退二十一日城賊援賊大舉猛撲前後長濠勢極
悍驚經我軍二三成隊病已愈者鎗礮環擊斃賊極多該逆慙
不畏死晝夜不休二十二日竟以長圍之勢東則以大礮攻前
敵各營西則以大股犯洲上各營意圖梗我運道各營初則憑
濠穩擊繼派精銳追勦殲斃不少奪旗幟多件弟是夜於洲上
增築連珠小壘十餘座以濠內策應兵與湘恒等營餘力兵守
之嗣次日昇舢板數隻入藕塘協守自此則運道固矣二十三
四該逆見無隙可乘遂路路猛攻兩日兩夜二十五日賊之攻
東路各營者竟多以炸礮西瓜開花礮子轟入各壘內傷人不
少幸各營將士堅志苦守不移一步得保無虞其撲西路各營

者經我軍於申刻乘賊之懈出精銳破賊四壘殺賊擒賊三百餘名獲旗幟鎗礮不少從此西南鬆勁二十六七八等日賊遂悉力猛攻東路與前濠自晝達夜自夜達旦不稍休息二十九日賊勢更凶均逼近長濠拔取花籬洋鎗子莫名其密火箭噴筒均入壘內每賊並携草包一束將第二層前濠填塞數丈矣各營極力堵勦斃賊不知其數弟是日因搶護長濠受洋子傷下午仍負創上濠以安勇心所幸子出現已全愈請釋肫注初一日後路又到一極大之股人數不少其先在此之賊仍猛攻東路各營日夜不休仍挖暗地道所幸我軍人心堅定晝夜小心嚴防密範當可穩守久守以全大局也

與李少泉

初五日肅呈寸牋計邀賜覽此間援賊雖經初五早痛割初六早五鼓復來猛撲東路副後等營幸燒斃轟斃之賊數百名威乃卻然其恃人數多火器精晝夜耽耽環伺且開挖地道如故初七早五更長勝嘉字等營派奮勇出濠毀賊明暗地道二處斃賊數百名初八九十等日夜忠侍兩酋督羣賊仍以洋礮火箭火蛋明攻東路各營於上而暗挖地道於下不稍休息經我軍以鎗礮火蛋禦其明攻斃賊雖多無如其前者拖去後者繼進何此次極力堵勒幸保無虞國荃現飭副後等營增內濠內牆以防其暗地道濠牆均已成工其地道亦已距外濠不遠第

不知何時穿越我軍惟慎以防之嚴爲禦之該逆當不能逞也
現在該逆正修濬溝壘作持久之勢敝軍病勇苦守已逾兼旬
勞瘁萬狀幸蕪湖王鎮軍分三營來此於昨日登陸入濠助守
東路各營稍足以狀軍威而均勞逸蒙直夫將軍由揚派來四
營初九已抵江浦今日可以渡江一俟人力稍足仍當出濠將
東路賊厚之處痛勦一二次方可以鬆勁耳荃傷痕已愈足以
仰慰肫懷

復朱芳浦羅旋吉

頃接來函知初二日賊從護駕墩過渡初三有賊礮船窺伺三
叉河想日內必有幾番猛撲務祈麾下穩靜固守嚴密防範并

會同水師堵住穩保此隘守住營壘是爲至要大局關係非淺務望堅忍守此數壘以全南岸之大局弟必爲之詳請保舉弁勇耳此間援賊於月之初一日猛撲吉後嘉字等營者較前尤悍弟先因吉後營牆壘不高飭各營於二十九夜派隊在吉後營壘內增修一牆初一早黎明告成是日賊已將吉後營花籬拔去甚多并以火箭噴筒均入壘內賊遂乘機路路猛撲大聲疾呼齊進經各營靜以待之其逼近壘邊然後以鎗礮連環擊之轟打一時之久副將倪桂搶護礮臺斃賊數名該逆乃少退倪副將亦中傷陣亡該員奮勇無匹實爲可惜是日及夜間共擊斃轟斃之賊甚多但其挖地道仍如故耳目下我軍防守仍

刻不稍懈二十九日弟因搶護長濠受洋子傷幸子已出易爲醫治尙可照料一切請紓憂念僞輔王率大股窺伺甯國想鮑軍近日亦大有戰事不能速來援我也知念併聞

復李良臣

前復一函計達英覽頃奉兩次惠書敬承關注逾常感激無已承允烏江一卡如遇敝營之軍需米糧煤炭蘆蓆柴草小菜船隻隨到隨放感何可言求卽日札飭四壩卡員遵照辦理百叩百叩此間援賊於初六早五更時分猛攻東路副後等營濠壘勢尤凶悍其洋鎗洋礮施放不休經我軍鎮靜以待俟其愈逼愈近伏至濠邊然後以鎗礮排擊火藥火蛋一併擲下擊斃焚

斃之賊不知其數該逆以傷斃過多始行退去是夜仍攻撲如常初七早五更嘉字長勝各營見賊疲困露宿告奮勇數百人出濠乘其不備攻破賊卡數處將賊之明暗地道焚燬賊大驚亂奔遁不遑我軍包抄圍殺頗有斬馘焚斃亦不少惟尚有暗地道三處未見穿越國荃已令其增修內牆內濠以禦之縱或暗地道冲突定可堵住無虞貞幹舍弟見東路各營緊急恐勇士難耐久勞帶人八哨隨機策應已在此十餘晝夜助守甚爲得力初八九十等日賊之攻東路各營者凶焰稍熄日以洋鎗洋礮及開花西瓜礮子明攻於上而仍暗挖地道於下幸我軍內濠內牆業已做成仍復嚴密防範刻不稍懈過此風浪之後

則賊必計窮力蹙而我軍守局更穩固矣家兄前調駐蕪之陞
字數營王可陞已先率三營於初九下午抵此又蒙都將軍分
撥千七百人來助守亦於今日到長濠內一俟兵力稍厚定當
派隊出濠與賊力決猛戰方足以挫寇氛耳目下賊以水陸全
力攻金柱關營壘甚爲猛悍幸敝軍振字吉左二千人倚水爲
險苦守堅定又蒙厚菴軍門派水師幫同堵剿已可保無虞其
犯甯郡一股者經鮑軍於初八日在高嶺等處大獲勝仗追剿
十餘里斬馘極衆大快人意知念并聞弟忝官江南幸與麾下
同舟共濟將來共事之日甚長務求事事照拂垂憐敝部之艱
窘則感高誼無既矣

與黃南叟

初九日肅布一函具報近日軍情諒已早登台覽此間如恆堵
勦初十一二等日賊之攻撲東路等營者仍前凶悍其未穿
之三處地道仍開挖如故十一夜三更時分賊以洋鎗洋礮逼
近濠壘施放不休我軍靜鎮不動俟其稍懈然後憑濠擊之斃
賊甚多今日黎明西路之賊悉歸併東路并多集門板及稻草
等件於東路前後濠外大約暗地道於今夜必見穿越希圖併
力冲突幸我軍內濠深浚復於各營派隊幫同堵勦想亦不能
飛越如賊之暗地道不能成則守局更固矣家兄前調駐蕪之
陞字數營王可陞已先率三營於初九下午抵此又蒙都將軍

分撥千七百人來助守亦於今日到長濠內一俟兵力稍厚定當派隊出濠與賊力決猛戰方足以挫寇氛耳惟敝軍現值堵
勤吃緊之時需用火器甚鉅現在所存無幾恐將來接濟爲艱
茲特懇乞吾叟商之次山方伯面商中丞公卽日迅速賜解火
藥五萬觔繩三萬盤并配齊大小各色羣子四萬觔以應急需
而利戰守并祈代請委員飛速起解來營爲荷盼切禱切如能
仰仗福威堵勤得手保全一偶之局則皆出自吾叟與中丞公
及次山方伯之賜也臨穎無任翹企待命之至

稟官中堂

竊國荃於十七日肅具蕪函計可先呈崇覽此間照常穩守十

七八日援賊之攻東路各營者勢已衰弱其所挖之暗地道尙未穿越我軍增內濠內牆深固定可保守無虞十九日據振字營專弁稱十八日辰時賊之大隊由上冊渡過小河經卑軍派駐守金柱關之振字兩營吉左兩營出隊至龍山礮會新後營團防營各二哨由青山包抄而上水師各營由三叉河而進該逆大敗我軍水陸追殺至上泗渡共擊斃溺斃之賊實有數六七千奪獲旗幟軍械馬匹不少水師搶奪賊礮船四五十號賊皆落水而死凡賊之過小河西岸無一存者其在東岸及太平府之賊悉向薛鎮一帶退遁矣有此一捷不特金柱關蕪湖穩固無虞卽金陵大營後路亦安如泰山矣知關慈注謹將卑軍

分守金柱關十八日大戰獲勝緣由肅稟奉聞伏維垂察鄂省
近日軍情若何統祈隨時賜示爲禱

復劉印渠

初七日肅復一函計邀台覽頃又奉八月初二日手翰猥蒙獎
飾逾恆雒誦臨風祇增顏甲閣下以潯事成功在即雖以秋闈
慶典莫回其英鷲果毅之心惟其權衡於輕重之間者審故其
處置於疑難之際者當也此刻金鐙凱歌想已喧徹於獨秀峯
下矣翹企蜺旌欽佩何似來諭論及島人一事宏議卓識與長
公暨少荃中丞之見相同所幸滬上六月虹橋之捷及昨八月
北新涇之捷均係以數千人擊敗強寇數萬轉危爲安彼中人

皆言爲僮見之勝仗想我軍聲威旣振或可弭其輕視之心縱令欲効微勞不過供驅策已耳弟頓兵白下埽穴無期兼以軍士病莫能興時岌岌有不克支持之懼壯心雖在措手爲難高明其何以策我也

復李雨蒼

接奉手教具悉台旆奉命赴浙於八月初三日抵衢旋以香帥需增募新軍現又由浙赴鄂且以餉需將卒之故更須往湘一行大約還湘時又當在冬初秋杪也夙維閣下槃才碩畫足以宏濟艱難此次鞠旅浙中同人無不拭目以觀雄才之建樹惜王事鞅掌不及東來鄙人未得一聆方略爲悵悵耳雷參將

勤慎勇敢本爲得力之員緣敝軍營官尙無乏可承故仍屈居
哨長麾下旣仍求舊謹卽令爲合浦之還祈造就而裁成之使
其得所而適於有用爲荷敝軍自抵金陵七月以前疊戰獲勝
惟提督張勝祿因傷而亡爲可悼惜耳自後賊勢衰敗不復來
窺乃凶狡之謀竟思竄擾我軍後路於八月二十六七日以大
股撲犯太平府之金柱關幸我畱駐該處之振字營奮力擊退
又經弟檄調吉左營會同駐守該處已可無虞惟近聞侍忠兩
酋糾合大股東援蠢蠢已動而敝軍士卒苦於癘疫能執干戈
者十僅一二向所恃以援我者惟鮑帥一軍聞現亦爲疾病所
苦且待逆旣動於浙皖南必將喫緊勢更不得東來萬一羣醜

環窺我軍實有岌岌之患頃已飛稟各憲懇求奏請多帥渡江
想秦事既有勝帥主持而豫事又聽鼠無須干鈞之弩以緩急
輕重權之或可得邀俞允東南大局係此一舉兄固未敢肩任
艱鉅要亦何敢稍事疏虞目下自當堅忍苦守以支危局請紓
臆注握別兩年耿耿之衷無日無之倘明年得會軍於淞杭之
間共平吳亂天緣會合亦快事也

致張凱章

前得墨林兄來函知麾下料理穉園總戎後事尙未回營刻下
計已將忠櫬昇回湘中矣聞貴部士卒病者亦極多物故者不
少此間與尊處同病相憐每念及之喟然長歎湘中子弟於役

遠方今已十載惟此次因病萎謝無故而摧殘精銳實堪傷痛之事不意天災流行遂至此極吾輩德薄能鮮累及士卒抱疚良深近日秋涼東風尚未少息不知貴部病者霍然否敝處則尙與八月同也此間賊旣屢不得逞乃凶狡之計竟思穿擾上游前月二十六七日有賊二三萬由小丹陽來犯金柱關幸振營穩堵賊卽敗退現又調吉左兩營會同駐守該處已可無虞惟聞侍忠兩逆糾合大股來援現有前隊已至丹陽之信而我軍疾病有加無已隊伍僅堪湊派兩三成萬一羣賊環窺殊有不克支持之懼前所恃以援我者猶聞有鮑公一軍奈渠軍亦苦疾疫且浙賊旣動皖南亦形喫緊也目下卽猝遇風波弟自

當堅忍苦守以支危局此區區之微忱若能如願而償方可告慰知己耳

稟官中堂

初十日肅具蕪稟計呈慈覽卑軍如常防範幸託安謐忠逆率大股援賊昨日已到今日距卑軍後濠不遠旗幟露面者迷山漫野東自方山西至板橋鎮橫列五六十里星羅棋布爲數實有七八萬人午刻有騎馬賊目及先鋒悍賊數千人近濠挑戰以鎗礮擊退大約日內必有幾番猛撲惟卑軍病勇尙未大就痊可目下僅能派二成隊穩守營壘站濠而已昨日據擒賊供稱僞輔王有意復竄甯國黃老虎之子率數萬人意欲乘虛上

竄僞忠王等酋率悍賊實數將十萬人來援金陵等語視此情形賊挾全力來謀竄恐羸病之師不足以與之久持且獨居前敵不可孤立無援春霆軍門於月初染病赴蕪湖調養其部下既苦於疾病之纏綿若復爲輔逆牽制其不能前來援應已屬意中之事前懇中堂奏請多公返旆東行來此會勦想素叨慈注必蒙會疏入 告國荃惟督率各營堅忍以待事機之轉徐謀勦辦之法所日夕盼望者惟多軍來援耳刻下卑軍極力晝夜穩守小心謹慎或可勉強支撐危局上慰慈廑耳

復朱芳浦

頃接來函藉悉壹是賊以重兵窺金柱關希圖梗我後路現在

旋吉兄既無庸下來合吉左營二千人會同水師保此要隘當能屹如山立至恐賊船由花津偷渡請添營預防之說敵處正當援賊猛撲之時尙嫌兵力單薄無從調撥尊處本極關緊要之後路而兵力祇能穩守汎地不能兼顧旁路弟所深知煩兄總以一意擔當汎地爲要此間援賊晝夜猛攻曾不少息連日賊勢趨重洲上一帶弟於是增築小壘十餘座以濠內策應兵與湘恆等營餘力兵聯絡穩守賊無所施其技竟以長圍之勢西則意圖梗我運道東則猛攻前敵并以大股撲猛字營哨壘經我軍鎗礮對擊斃賊不少其撲後濠之賊二十五日竟以洋人炸礮攻東路各營經劉南雲鎮靜穩守屹立不動下午仁愼

等營乘西南賊勢稍衰出奮勇撲賊四壘殺賊擒賊三百餘名奪鎗礮旗幟不少賊現添僞對王等率二三萬人又來幸我軍糧路經事恆舍弟極力保固並會商水師舛舫板二隻入蓮塘協守而濠內人心大定益可穩固無虞矣知念奉聞

與毛寄雲

初一日肅具蕪函計呈台鑒此間自十月初一二三我軍攻破賊地道各壘殺賊無數賊遂意消氣阻矣初四日派隊出濠撲賊數壘一律蕩平而忠酋巢穴大隊竟不敢近前與我軍相角夜間賊壘中光甚多三更盡微有烟起四更我軍預備隊伍乘賊凶亂之際遂出隊撲進向前五更時以火蛋火箭噴筒攻打

賊壘初五早天明攻破賊四壘賊鮮有脫者其餘西南二方數十壘均經我軍燒燬餘賊在西南者均向秣陵關而遁在東路者均向城邊南門外雨花臺而遁經各營隊伍尾追盡焚其壘內棚帳草木等件并派馬步大隊分路追殺殿後之悍賊不知其數幸獲全勝實快人心而寒逆膽知關肫注謹以奉聞

與鮑春霆

第四次專函兩次細字密書不知可邀英盼否迭接上游來函知賊由灣沚渡河分紮堅壘意圖梗塞貴軍與老湘營之糧路計殊狡毒竊念麾下與老湘兩軍皆百戰雄師不過因今歲病亡太多宜專主穩守而不宜出戰俟賊斃稍衰我軍人足再打

一二仗原不難埽此一股第灣沚之糧路梗塞未審南陔尚可運糧入營否現在營中之火藥糧食尙能久支持否弟聞賊勢趨重定郡之信卽焦灼萬分祇以此間畱守城外各壘之賊及分屯六郎橋秣陵關之賊尙有十數萬人耽耽環視日須嚴密戒備防其復來故不能分兵以應尊處之急抱歉萬分雖已商請王峰臣率陞字五營卽日坐船至蕪湖與周漢卿二營及水師各營相機進剿求通灣沚之糧路藉爲貴軍之聲援而願船上行亦恐非旬日不能抵蕪湖又兵太單其剿辦能得手否尙未可必國荃再四思維與其株守一隅有坐困之慮不如暫縮地爲自全之謀且可以騰出兵力保沿江各城之要隘如異日

徽祁旌績有驚亦可相機策應不過數月新招人到齊整頓齊全蓄養銳氣再圖進取則所向有功不僅易得甯國也已將鄙意函告家兄第用兵之道當以利害之大小輕重爲進退伸縮之機如麾下與老湘營熟商兩軍之米糧火藥尚可久持則堅守以待蔣軍之來援固爲至幸如自度米糧軍火皆不能久持而灣沚糧道又爲之梗塞則不如預謀全師之法徐圖進取之機查甯國至清弋江南陵旌德均不過數十里或與老湘營商定整齊拔出捲疊爲營穩紮穩打徐徐收縮必不致爲賊所乘亦是一法此係爲全局通盤打算而言並非爲顧全一人之私計也望麾下與老湘營內度兵力外審賊情或守以待援或縮

至清弋江南陵均相機決然行之如果出此策暫棄甯國之空
城力顧上游之全局卽將來有議及麾下輕退者儘可以弟函
爲詞無論何項譴責弟願一身承當斷不貽累麾下與老湘營
也軍機之危險利鈍祇爭於須臾俄頃之間一髮千鈞關係甚
大尙希麾下熟籌而審處之無任盼禱

復吳曉帆

頃接十一日惠函及咨示稟牘敬悉閣下與白齋文商定準於
月內率常軍揚帆上駛先攻九洑七里洲僞壘晤教匪遙無任
盼禱查金陵之賊偷過北岸者已由浦口山後繞竄新甸廟一
帶其欲乘虛內竄已無疑義見在和含巢無皆無兵扼守傲軍

僅能抽撥千人分扼西梁山裕溪口要隘保全糧路當援賊環伺敝軍之時勢不能再爲分撥已稟請江皖各大帥派隊入皖北適中之地迎頭勦辦惟目下過江之賊尙不過數萬人若再延數日則北竄之賊愈眾而愈難收拾務望閣下率常勝軍飛速而來如出不意將九洑七里洲僞壘先行蕩平則有裨於全局甚非淺鮮矣敝部信字長勝吉後等營於二十二日出濠截解糧之賊生擒九十餘名據供係忠酋之子所帶約有二三萬人由太平秣陵關而來者亦卽過江北去也所望雄師早到打開九洑洲則北岸軍民悉賴之矣

復彭雪琴

接奉環諭敬聆種種承示十八二十一大捷後二十五復東渡
勦辦薛鎮遇賊鏖戰殺賊最多焚糧無數仰見籌畫周詳聲威
丕振凡我後路之得以保全者皆公之賜也佩慰奚如周漢卿
帶傷聞易醫治刻下計可就愈矣念念峰臣兄兩營已於三十
日抵此入濠從此兵力益厚站腳益穩矣此間二十七早經劉
南雲派奮勇出濠乘其不備破賊地道壘三處賊驚惶失措東
奔西突該營包抄圍殺共斃賊二百餘人生擒三十餘名二十
九日南雲又挖穿一地道殺賊二十餘人灌以污穢之水三十
夜三更蕭開印等派隊出濠又破賊地道壘二處殺賊數十人
刻下東路賊勢亦大衰卽地道亦無能爲矣惟候援軍從後路

打來方可收前後夾擊之效也知關蓋念謹以奉聞口號業已領到矣

復周沐潤

頃披華翰備荷藻飾並以弟前受微傷殷殷爲念幸早已全愈足慰雅懷家兄借重長才不知台旃何時乃可抵安慶念念弟孤軍深入五月初直搗金陵城下幸稱得手乃僞天王洪逆死踞老巢調各酋六月來援一次我軍幸七戰皆捷詎天災流行癘疫大起敵部二萬人病者什之七八無辜摧折壯健之卒竟什之三四焉忠侍各酋大舉謀我號稱百萬之衆分三大股一圍甯國一由東壩竄太平金柱關等處一來此間三路並發而

圍我軍之一股獨多且悍自閏月十九迄十月初五歷四十餘晝夜輪番猛撲未嘗少息或前後夾攻意圖斷我糧道或分挖地道以轟我濠壘百計兼施狡毒異常弟與事恆舍弟及諸將率數千未病之師當二十餘萬凶橫之寇苦守力戰幸克支持危局於前月初五十二大獲全勝斃賊數萬人至月初五日將援賊擊退該逆勢窮力竭由秣陵關一路遁去經我軍追殺極多其犯太平金柱關者經敵部振宇吉左等營與水師各營十八日痛斃賊近萬鮑張二軍在甯國亦迭有捷音足以自固惟金陵城大而堅尙須添勁旅數萬人乃可合圍勦辦耳知念奉聞

復多禮堂

初六日郵寄一函度邀英覽頌奉九月二十六日賜書眷念殷
殷無任銘感屢讀 諭旨知 朝廷以關中重寄非公莫屬可
見勲威卓著中外傾心逖聽捷音日夜以企弟創痕已愈自十
月初五擊退援賊後因感冒風寒抱病數日近託福庇業已痊
可矣城賊無甚動靜忠酋大股據探報向溧水溧陽東壩一路
而去其上犯甯郡者亦多且悍昨接雪帥來函云初五日賊由
蕪湖灣汴渡河因水落舟師不能阻截鮑軍有前後受敵之勢
且慮其上竄皖南則防不勝防江西亦不免喫緊矣家兄已早
調何總戎紹彩及吳幹臣所部各營來助鮑軍如能截其上竄

之路而鮑張二軍能竭力支持於甯郡方於全局無礙知關肫
注並以布聞